

kanton

KANTONALNA UPRAVA ZA INSPEKCIJSKE POSLOVE UNSKO-SANSKOG KANTONA

Pojačane kontrole cijena peleta, rada u dane praznika i kvalitete namirnica životinjskog porijekla

Vlada Federacije BiH na sjednici održanoj 10. novembra ove godine donijela je Odluku o propisivanju mjere neposredne kontrole cijena određivanjem najvišeg nivoa cijena za pelet. Ovom Odlukom propisana je najviša prodajna cijena peleta i to na način da ista ne može u trgovinama na malo prelaziti 480 KM plus PDV (ukupno 561,60 KM) po toni. Za realizaciju i nadzor nad provođenjem ove Odluke zadužene su federalna i kantonalne tržišne inspekcije.

- Kako bi se osiguralo striktno poštivanje propisane cijene, odnosno zaustavilo prekomjerno i neopravdano povećanje cijene ovog energenta, inspektori Kantonalne uprave za inspeksijske poslove provode pojačane inspeksijske nadzore proizvođača i distributera peleta koji posluju na području Unsko-sanskog kantona, kaže Šerif Kosatica, direktor Kantonalne uprave za inspeksijske poslove Unsko-sanskog kantona.

Kazne za nepoštivanje propisanih mjera neposredne kontrole cijena utvrđene su Zakonom o kontroli cijena i kreću se od 1.000 do 10.000 KM za pravna lica, 250 do 2.500 KM za odgovorno lice u pravnom licu, te od 500 do 1.500 KM za fizička lica. Stoga iz Kantonalne uprave za inspeksijske poslove pozivaju subjekte nadzora na poštivanje Odluke Vlade F BiH.



- Planirali smo provođenje aktivnosti koje imaju za cilj sistemsko uređenje turističke djelatnosti na području Unsko-sanskog kantona - S ciljem transparentnog rada i uspostavljanja što kvalitetnije saradnje sa subjektima nadzora i građanima, u planu imamo i organizovanje "Dana otvorenih vrata", kaže Šerif Kosatica, direktor Kantonalne uprave za inspeksijske poslove

Ograničena cijena peleta

- I ovom prilikom pozvao bih sve subjekte nadzora, proizvođače i prometnike peleta, da postupe u skladu sa Odlukom Vlade Federacije, odnosno da koriguju cijene peleta i na taj način izbjegnu represivne mjere postupajućih inspektora. Građane bih podsjetio da je cijena peleta ograničena na 561,60 KM u maloprodaji (480+PDV) te ih zamolio da nam, ukoliko uočite da se pelet prodaje po većoj cijeni od ove, to obavezno prijavite, ističe direktor Kosatica.

Početkom aprila ove godine Vlada Federacije BiH također je donijela Odluku o mjerama neposredne kontrole cijena u odnosu na propisane marže za pojedine osnovne životne namirnice i druge proizvode kao i

naftu i naftne derivate, tako da inspektori tržišno, turističko - ugostiteljske inspekcije od tada pa do danas u kontinuitetu provode i kontrole kretanja cijena na tržištu, odnosno nadziru provođenje i ove Odluke Vlade F BiH, ali i drugih propisa iz ove oblasti.

- Od stupanja na snagu ove Odluke, uz nadzore nad poštivanjem zakonskih propisa iz oblasti tržišno-tur-

ističko ugostiteljske inspekcije, inspektori kontrolišu i poštivanje ove Odluke. Do kraja godine u fokusu aktivnosti Kantonalne uprave za inspeksijske poslove također će biti kontrole kvalitete proizvoda životinjskog porijekla. Veterinarski inspektori, kontrolisat će trgovačke radnje, markete, pijace, mesnice, odnosno sva ona pravna i fizička lica koja se bave proizvodnjom i stavljanjem hrane u promet. I ova aktivnost od iznimnog je značaja posebno sa aspekta zaštite zdravlja stanovništva, ali i zbog činjenice da će uklanjanje sa tržišta neispravnih i nepravilno deklariranih proizvoda, doprinjeti vraćanju povjerenja potrošača. Naravno, kao i svih prethodnih godina pojačani nadzori provodit će se i u dane praznika. Stoga pozivamo subjekte nadzora da se pridržavaju važećih odluka o radnom vremenu koje su donijela općinska odnosno gradska vijeća, ističe Kosatica i dodaje da i pored svih izazova sa kojima se susreću u radu, sve planirane aktivnosti uspješno realiziraju.

Ispunjen godišnji plan rada

- Svaki od osam inspektorata uspješno provodi nadzore iz svoje oblasti i na osnovu analize izvještaja za deset mjeseci ove godine ponosno mogu reći da smo skoro 100 % ispunili plan, iako imamo

još skoro dva mjeseca do kraja godine. Kada su u pitanju aktivnosti u narednoj godini nastavaljamo "borbu" protiv "sive ekonomije" i "rada na crno". Također, planirali smo provođenje aktivnosti koje imaju za cilj sistemsko uređenje turističke djelatnosti na području Unsko-sanskog kantona. S ciljem transparentnog rada i uspostavljanja što kvalitetnije saradnje sa subjektima nadzora i građanima, u planu imamo i organizovanje "Dana otvorenih vrata". Novina je ovo koju planiramo uvesti a ideja je da jednom sedmično pružimo priliku subjektima nadzora da razgovaraju sa inspektorima o eventualnim nedoumicama koje imaju, odnosno da inspektori Uprave, svako iz svoje oblasti upoznaju subjekte nadzora sa zakonskim propisima i eventualnim izmjenama istih, a kojih se moraju pridržavati u svom radu. Mišljenja smo, da će ova aktivnost imati preventivni učinak i da će se pozitivno odraziti na sveukupan poslovni ambijent u Unsko-sanskom kantonu, odnosno da će se njenom realizacijom smanjiti broj subjekata nadzora kojima se, zbog grubih kršenja zakonskih propisa, moraju izreći represivne mjere, a što nam je u konačnici i krajnji cilj, kaže Šerif Kosatica, direktor Kantonalne uprave za inspeksijske poslove Unsko-sanskog kantona. /S.Pašagić

NACIONALNI PARK „UNA“ DOBITNIK VELIKE ZLATNE MEDALJE

Priznanje za vrhunski nivo organizacije projekta „Una za Unesco“

- Novosadski sajam je potvrdio činjenicu da Nacionalni park „Una“ iz dana u dan postaje sve traženija i prepoznatljivija turistička destinacija u regionu i svijetu

U sklopu programa održavanja 53. Međunarodnog



sajma turizma u Novom Sadu, u petak 18. novembra, upriličeno je Veće šampiona, a po odabiru stručne komisije dodijeljena su najznačajnija priznanja najuspješnijim kompanijama, pojedincima i institucijama.

Nacionalni park "Una" dobitnik je velike zlatne medalje i priznanja za vrhunski nivo organizacije projekta "Una za Unesco" koji su dokaz i potvrda kvalitetnog rada ovog preduzeća i zaštićenog područja, kao i dobre promocije turističkih

potencijala.

Za visoki kvalitet usluga u ugostiteljstvu na Novosadskom sajmu, sa zlatnom medaljom nagrađeni su i partneri Nacionalnog parka "Una" - Hotel "Rekić" i Hotel "Swiss Plus" iz Bihaća.

Novosadski sajam okupio je više od 250 učesnika na štandovima izlagača iz Srbije, zemlje-partnera Crne Gore, Bosne i Hercegovine, Sjeverne Makedonije, Hrvatske, Slovenije, Mađarske, Turske, Rumunije, Kipra, Bugarske, Iraka i Austrije.

Novosadski sajam je potvrdio činjenicu da Nacionalni park "Una" iz dana u dan postaje sve traženija i prepoznatljivija turistička destinacija u regionu i svijetu. Tokom tri dana koliko je trajao sajam ostvarena su mnoga nova poznanstva, a u najavi su saradnje sa novim turističkim agencijama iz regiona, zaštićenim područjima. I ove, kao i prethodnih godina, vladalo je veliko interesovanje brojnih posjetilaca za Nacionalni park "Una" i njegovu turističku ponudu.